

Šokovi na benzinskim crpkama zbog poskupljenja goriva!



Od početka listopada Federalnom ministarstvu trgovine pristiglo je čak 955 obavijesti o poskupljenju goriva za pet feninga po litru. S obzirom na to da je u Federaciji **BiH** registrirano 705 benzinskih crpki, to znači da su na nekim za 15 dana dva puta podizane cijene derivata.

Maloprodajna cijena **BMB** 95 u Federaciji **BiH** sredinom ovog mjeseca porasla je za 4,02 posto u odnosu na kolovoz. Istovremeno, maloprodajna cijena dizela u Federaciji **BiH** viša je za 6,51 posto u odnosu na prethodni mjesec.

Maloprodajne cijene premium bezolovnog benzina 95 kreću se od 2,16 do 2,46 **KM** po litru, a dizela (10 ppm) od 2,16 do 2,41 **KM** po litru. Prosječna maloprodajna cijena benzina je 2,33 **KM** po litru, a dizela 2,29 **KM**.

“Porast cijena naftnih derivata uzrokovan je rastom cijena sirove nafte na berzama na globalnom svjetskom tržištu i rastom kursa dolara. Ta dinamika cijena sirove nafte utječe i na berzanske kotacije naftnih derivata na referentnim berzama u Mediteranu koje se koriste za obračun cijena goriva u južnoj Europi, uključujući **BiH**. Stoga je evidentno da je vanjski faktor utjecao na povećanje rafinerijskih cijena, odnosno nabavnih cijena derivata, a **BiH** kao uvoznik na to ne može utjecati”, rečeno nam je iz Ministarstva.

Cijene goriva na benzinskim crpkama u Republici Srpskoj su u porastu u prosjeku za četiri feninga po litru za sve vrste derivata, kao i cijene tečnog naftnog plina.

JEFTINIJE U RS

“Cijena plina je drastično skočila u posljednjih dvadesetak dana, a varirat će i u narednom periodu jer se konstantan rast berze reflektira na tržišta”, rečeno je iz **Privredne komore RS**.

Cijene na benzinskim pumpama u **RS** kreću se u prosjeku za benzin 2,26 **KM**, a za dizel 2,24 **KM** po litru. Cijene su u odnosu na Federaciju **BiH** niže u prosjeku za 10 feninga.

HRVATSKA OGRANIČILA CIJENE

Vlada Hrvatske na posljednjoj sjednici odlučila je zaustaviti kontinuirani rast cijena goriva. Trgovcima su odredili maksimalnu cijenu dizela i benzina. Takvu odluku Vlada je donijela jer je trenutna cijena goriva viša od 11 kuna (oko 2,80 **KM**), što je rekordna cijena u ovoj državi ikad zabilježena. Odlukom Vlade određena je maksimalna maloprodajna cijena benzina na 11,10, a dizela na 11 kuna.

